

**«СЛАВА» - ОТЦЕВ, ГЛАС 6:**

**Д**аниил муж желаний,/ камень без руки отсечен видев Тя,  
Господи,/ Младенца без семени рождённа,/ пронарече  
Тя из Девы воплощенна Слова,/ неперменнаго Бóга, // и  
Спаса душ наших.

**«И ныне» - предпразднства, глас тойже. [Византиево:]**

**В**ертепе благоукрасия,/ Агница бо грядет, чревоносящи  
Христа:/ ясли же подымите,/ словом разрешившаго от  
безсловеснаго деяния нас земнородных./ Пастырие сви-  
ряюще, свидетельствуйте чудеси страшному:/ и волсви от  
Персиды,/ злато и ливан и смирну, Царю принесите:/ яко  
явися Господь из Девы Матере./ Емуже и приникши рабски  
Мати поклонися,/ и привещаше к держимому на объяти-их  
Ея:/ како всеялся еси Мне?/ или како прозябл еси во Мне, //  
избавителю мой и Бóже?

**Вход прокимен дне. Чтения 3 святых отец.**

## НА ЛИТИИ

**стихиры предпразднства, на ряду, в котором числе сия Неделя поется, яже писаны на стиховне.**

### **И отцев, глас 1:**

**Лучами облиставшеся богоглаголания, великоименитии пророцы, присно ублажаются, и речения Духа плодоносяще, неизреченное Рождество Христа Бога всем проповедаша, законно же кончину прияша, поживше жизнь пречудную.**

### **Слава, глас 3. [Германово:]**

**Праотцев собор, празднолюбцы приидите,/ псаломски да восхвалим:/ Адама праотца, Еноха, Ноа, Мелхиседека,/ Авраама, Исаака и Иакова:/ по законе Моисея, и Аарона, и Иисуса,/ Самуила и Давида:/ с нимиже Исаию, Иеремию, Иезекииля, и Даниила,/ дванадесять, вкупе Илию, Елиссее, и всех:/ Захарию, и Крестителя, и проповедавшия Христа, // Жизнь и Воскресение рода нашего.**

### **И ныне, предпразднства, глас тойже:**

**Благоукрасися Вифлееме, отверзеся бо Едем: готовися Евфрафо, обновляется бо Адам, и Ева с ним: клятва бо разорися, спасение миру процвете, и души праведных украшаются: яко дар дароносия, вместо мира пение приносяще, спасение душевное, и нетление приемлюще. Се бо в яслех возлежай, предповелевает пение духовное совершати, вопиющим непрестанно: Господи, слава Тебе.**